

Resolución de concesión directa de axudas destinadas a paliar a pobreza enerxética en consumidores vulnerables, dentro do programa denominado bono social térmico, no exercicio 2021

ANTECEDENTES

Primeiro. O Real decreto lei 15/2018, do 5 de outubro, de medidas urxentes para a transición enerxética e a protección dos consumidores, creou un programa de concesión directa de axudas destinadas a paliar a pobreza enerxética en consumidores vulnerables, no que respecta á enerxía destinada a calefacción, auga quente sanitaria ou cociña, denominado bono social térmico.

A axuda a conceder ten como finalidade compensar gastos necesarios para garantir o subministro de enerxía para usos térmicos ou o apoio a actuación de aforro ou melloras da eficiencia enerxética aos consumidores vulnerables.

Esta axuda é compatible coa percepción doutras subvencións, axudas, ingresos ou recursos, para a mesma finalidade procedentes de calquera Administración ou entes públicos e privados, así como coa percepción do bono social de electricidade.

O bono social térmico financiarase con cargo aos Orzamentos Xerais do Estado e o outorgamento destas axudas estará condicionado á existencia de dispoñibilidade orzamentaria e, en todo caso, ao límite de dispoñibilidade orzamentaria fixado na Lei de orzamentos xerais do Estado.

En cada exercicio serán persoas beneficiarias aqueles/as consumidores/as que sexan beneficiarios/as do bono social de electricidade a 31 de decembro do ano anterior.

Segundo. En virtude da Sentenza 134/2020, do 23 de setembro de 2020, do Tribunal Constitucional, que estima parcialmente o recurso de inconstitucionalidade número 4178-2019, interposto polo Goberno Vasco en relación a diversos preceptos do referido Real decreto-lei 15/2018, do 5 de outubro, decláranse inconstitucionais e nulos os incisos "mediante la concesión de un pago único anual» do número 1 do artigo 9 referido aos criterios de distribución da axuda do bono entre os beneficiarios; os incisos "junto con la información de los beneficiarios y los importes que les corresponden de acuerdo con lo previsto en los apartados anteriores" e "a partir de la información a que hace referencia el artículo 11" do número 2 e o inciso "durante el primer trimestre del año» do número 3 do artigo 10 referido ao procedemento para a determinación e o pago do importe da axuda. Así mesmo, declarase inconstitucional a disposición adicional novena e a disposición derradeira terceira do dito Real Decreto-lei 15/2018, do 5 de outubro, desestimando o recurso en todo o demais.

Terceiro. De conformidade co exposto, a xestión e o pago das axudas correspóndelle ás comunidades autónomas e ás cidades con estatuto de autonomía.





Pola súa parte, o Ministerio para a Transición Ecolóxica e Reto Demográfico calcula a distribución territorial do orzamento e transfere os importes ás administracións competentes para o seu pagamento, o que tivo lugar por Resolución da Secretaría de Estado de Enerxía, de data 1/12/2021, pola que se autoriza a transferencia de crédito a 14 Comunidades Autónomas en concepto do Bono Social Térmico para o ano 2021.

A concesión destas axudas a través desta resolución, no actual contexto da crise sanitaria derivada da epidemia de Covid-19, ven determinada no ámbito autonómico pola distribución competencial para facer fronte a súa xestión e á recepción dos fondos do Estado destinados ao seu pagamento.

CONSIDERACIÓNS LEGAIS E TÉCNICAS

Primeiro. De conformidade co Decreto 216/2020, do 3 de decembro, polo que se establece a estrutura orgánica da Consellería de Política Social, correspóndelle a este órgano superior da Administración xeral da Comunidade Autónoma de Galicia propoñer e executar as directrices xerais do Goberno no ámbito do benestar, que engloban as competencias en materia de servizos sociais, incluíndo entre outras as políticas de benestar social, inclusión social, servizos comunitarios, inmigración, na forma establecida no dito decreto e a través do seu órgano de dirección á Dirección Xeral de Inclusión Social.

No exercicio de ditas competencias a Consellería asumirá a concesión e pagamento das axudas outorgadas en concepto do bono social térmico regulado no Real decreto lei 15/2018, do 5 de outubro, de medidas urxentes para a transición enerxética e a protección dos consumidores, financiado con Fondos do Estado, con cargo ao orzamento do Ministerio para a Transición Ecolóxica e Reto Demográfico correspondente ao exercicio 2021, mediante a transferencia de crédito autorizada por Resolución da Secretaría de Estado de Enerxía, de data 1/12/2021.

Segundo. A concesión destas axudas realízase de forma directa de conformidade co establecido no artigo 22.2 da Lei 38/2003, do 17 de novembro, xeral de subvencións, os artigos 19.4 b) e 26 da Lei 9/2007, do 13 de xuño, de subvencións de Galicia, e o artigo 39 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, ao vir impostas por unha norma con rango legal.

En todo caso, garántese a posibilidade de renunciar á axuda por parte dos/das beneficiarios/as que así o soliciten.

Visto o Real decreto lei 15/2018, do 5 de outubro, a Lei 38/2003, do 17 de novembro, a Lei 9/2007, do 13 de xuño e o Decreto 11/2009, do 8 de xaneiro, e de conformidade coas competencias que me atribúe o artigo 34 da Lei 1/1983 do 22 de febreiro, da Xunta e da súa Presidencia,





RESOLVO:

Primeiro. Obxecto e finalidade da axuda concedida

1. Esta resolución ten por obxecto a concesión directa de axudas destinadas a paliar a pobreza enerxética en consumidores vulnerables, dentro dun programa denominado bono social térmico no ano 2021, ás persoas consumidoras que sexan beneficiarias do bono social de electricidade previsto no artigo 45 da Lei 24/2013, do 26 de decembro, do sector eléctrico, o 31 de decembro do ano 2020.

2. A axuda ten como finalidade compensar os gastos necesarios para garantir o subministro de enerxía para usos térmicos ou o apoio a actuacións de apoio ou melloras da eficiencia enerxética aos consumidores vulnerables.

Segundo. Compatibilidade con outras modalidades de axudas

Esta axuda é compatible coa percepción doutras subvencións, axudas, ingresos ou recursos para a mesma finalidade procedentes de calquera Administración ou entes públicos ou privados, nacionais ou internacionais, das que puidesen beneficiarse os/as destinatarios/as da axuda. Así mesmo, será compatible coa percepción do Bono Social de Electricidade.

Terceiro. Crédito orzamentario

Estas axudas faranse efectivas con cargo á aplicación orzamentaria 13.03.312A.480.6, polo importe de 13.027.082,30 euros.

Cuarto. Contía da axuda

A contía da axuda que percibirá cada persoa beneficiaria determínase atendendo ao seu grao de vulnerabilidade segundo o define a norma reguladora do bono social eléctrico, así como á zona climática en que se localice a vivenda na que se atope empadroadado, de conformidade coa metodoloxía indicada no artigo 2 do Real decreto lei 23/2021, do 26 de outubro, de medidas urxentes en materia de enerxía para a protección dos consumidores e a introdución de transparencia nos mercados maioristas e minoristas de electricidade e gas natural, que modifica, para o ano 2021, a establecida no anexo I do Real decreto lei 15/2018, do 5 de outubro, de medidas urxentes para a transición enerxética e a protección dos consumidores, sempre dentro das dispoñibilidades orzamentarias.

Quinto. Persoas beneficiarias e publicación

1. De acordo co artigo 8 do Real decreto lei 15/2018, do 5 de outubro, en cada exercicio serán persoas beneficiarias do bono social térmico aquelas persoas consumidoras que sexan beneficiarias do bono social de electricidade previsto no artigo 45 da Lei 24/2013, do 26 de decembro, o 31 de decembro do ano anterior.





Para o exercicio 2021 son persoas beneficiarias sesenta e seis mil trescentas noventa e seis persoas consumidoras beneficiarias do bono social de electricidade previsto no artigo 45 da Lei 24/2013, do 26 de decembro, do sector eléctrico, o 31 de decembro do ano 2020.

2. A relación de persoas beneficiarias publicarase no enderezo <https://politicassocial.xunta.gal/gl/areas/inclusion-social/axudas-e-prestacions/bono-social-termico>, con indicación dos/das beneficiarios/as coa documentación completa e os que teñen que comunicar determinados datos para poder cobrar a axuda. A publicación realizarase de conformidade coas garantías establecidas na Lei orgánica 3/2018, do 5 de decembro, de protección de datos persoais e garantía dos dereitos dixitais.

3. Publicada a relación, as persoas beneficiarias que teñen que presentar documentación para completar o seu expediente disporán dun prazo de 10 días hábiles para facelo.

4. No mesmo prazo de 10 días poderán comunicar a renuncia á axuda. Transcorrido o devandito prazo, entenderase que a axuda foi tacitamente aceptada.

Sexto. Documentación a achegar para o cobramento do bono social térmico

No caso de que a documentación estea incompleta, a Dirección Xeral de Inclusión Social requirirá a seguinte documentación necesaria, segundo proceda:

a) Certificación bancaria acreditativa da titularidade da conta da persoa beneficiaria ou da persoa autorizada para proceder ao cobramento da axuda.

b) O DNI da persoa beneficiaria da axuda e da persoa autorizada para proceder ao cobramento da axuda se non coincide co/coa beneficiario/a.

Sétimo. Comunicación complementaria da concesión

De xeito complementario á publicación da relación de persoas beneficiarias prevista no apartado quinto, a concesión do bono social térmico comunicarase ás persoas beneficiarias mediante correo postal individualizado:

Oitavo. Modo de presentar a documentación e información

1. A persoa beneficiaria poderá comunicar a renuncia, consultar e corrixir os datos, ou comunicar os datos pendentes a través dun dos seguintes medios:

a) Accedendo ao formulario electrónico a través do seguinte enlace: <https://bonosocialtermico.xunta.gal>, no que debe indicar o DNI e o código de referencia que se lle comunicará individualmente por correo postal. Se non se dispón dos medios necesarios, pode acudir aos puntos de acceso público, a internet ou aos servizos sociais do respectivo concello.





b) Presentando escrito, segundo o modelo que se lle comunicou individualmente por correo postal, dirixido á Dirección Xeral de Inclusión Social, Consellería de Política Social, Edificio Administrativo San Caetano s/n, 15781 Santiago de Compostela, en calquera rexistro das administracións públicas ou oficina de Correos.

2. Para obter máis información sobre o bono térmico, pode acceder ao enderezo <https://politicassocial.xunta.gal/gl/areas/inclusion-social/axudas-e-prestacions/bono-social-termico>, ou chamar ao 881 996 572, 881 996 573 e 881 996 574.

Noveno. Control e verificación

Todas as axudas concedidas ao abeiro desta resolución estarán sometidas á función interventora e de control financeiro exercida pola Intervención Xeral da Comunidade Autónoma, nos termos que establece o título III da Lei 9/2007, do 13 de xuño, e a súa normativa de desenvolvemento e ás actuacións de comprobación previstas na lexislación do Tribunal de Contas e do Consello de Contas polo que as familias beneficiarias quedan obrigadas a facilitar toda a información que lle sexa requirida por estes no exercicio das súas funcións de fiscalización e control do destino das axudas.

Décimo. Reintegro das axudas

Conforme ao establecido no artigo 40.1 .g) do Decreto 11/2009, do 8 de xaneiro, procederá o reintegro, total ou parcial, da axuda pública percibida no suposto de incumprimento das condicións establecidas para a súa concesión.

Undécimo. Transparencia e bo goberno

En virtude da situación de vulnerabilidade das persoas destinatarias destas axudas, de conformidade co artigo 17 da Lei 1/2016, do 18 de xaneiro, de transparencia e bo goberno, e co artigo 15.2 da Lei 9/2007, do 13 de xuño, a Consellería de Política Social non publicará a relación das persoas beneficiarias nin o importe das axudas concedidas.

Duodécimo. Impugnación

Contra esta resolución, que pon fin á vía administrativa, poderase interpor recurso potestativo de resolución ante a Consellería de Política Social, no prazo dun mes contado desde o día seguinte ao da súa notificación, ou ben directamente recurso contencioso-administrativo ante o Xulgado do contencioso-administrativo de Santiago de Compostela, no prazo de dous meses, nos termos previstos na Lei 29/1998, do 13 de xullo, reguladora da xurisdición contencioso-administrativa.

Santiago de Compostela,

A conselleira de Política Social

Fabiola García Martínez

